



MABIMS

التفسير العلمي

TAFSIR 'ILMI AYAT-AYAT KAUNIYYAT
MABIMS



Dr. Muhammad Haniff Bin Hassan

TUMBUH
TUMBUHAN

DITERBITKAN BERSAMA NEGARA BRUNEI DARUSSALAM, INDONESIA, MALAYSIA & SINGAPURA
PENYELARAS NEGARA BRUNEI DARUSSALAM

Dalam pengajian Al-Quran, keabsahan dan keistimewaan Al-Quran sebagai kitab suci boleh dikaji secara saintifik. Bahkan sudah ada banyak kajian oleh kalangan akademik yang membuktikan keistimewaan kandungan Al-Quran sebagai bukti ia bukan hasil

karangan manusia dan keterpeliharaan keasliannya dari sejak zaman Nabi s.a.w hingga ke masa kini.¹²⁴ Keabsahan dan kewibawaan Al-Quran sebagai wahyu boleh menjadi bukti proksi akan kewujudan Tuhan kerana, jika Al-Quran itu benar sebagai wahyu dan terpelihara keasliannya hingga kini, sudah tentunya kandungan yang ada di dalamnya adalah benar, bukan dongeng karangan manusia. Maka benarlah apa yang terkandung di dalamnya bahawa Tuhan itu ada dan tumbuhan serta alam adalah ciptaanNya dan tanda bagi kewujudan Tuhan. Penggunaan bukti proksi bagi menerima kebenaran adalah sesuatu yang rasional, lumrah dalam kehidupan manusia dalam menerima pengkhabaran dan sebahagian kaedah pembuktian yang diakui dalam metodologi kajian saintifik.¹²⁵ Sebagai contoh ramai sarjana yang belajar dan menerima sesuatu rumusan dan teori sains tanpa mengulang eksperimen yang dibuat oleh profesor yang mengajarnya kerana percaya akan kewibawaannya berdasarkan rekod akademik yang ada. Ramai kalangan akademik yang membaca buku kajian saintifik kemudian menjadikannya rujukan bagi kajiannya tanpa memeriksa sendiri dan mengulangi kajian itu bagi memastikan ia benar. Mereka memadai dengan percaya pada kredibiliti pengkaji yang disimpulkan dari rekod dan pencapaian akademiknya.¹²⁶

Dalam hal ini, beberapa kajian akademik yang dapat dikongsikan bagi membuktikan keistimewaan dan keaslian Al-Quran sebagai bukti proksi akan kewujudan Tuhan sebagai pencipta tumbuhan dan alam.

Pertama, ialah buku *The History of the Qur'anic Text from Revelation to Compilation: A Comparative Study with the Old and New Testaments*,¹²⁷ karangan Muhammad Mustafa Al-`Azami, seorang pakar dalam ilmu hadis yang mendapat ijazah doktor falsafah dari Univesiti Cambridge.¹²⁸ *Bukunya Studies in Hadith Methodology and Literature*¹²⁹ dan *On Schacht's Origins of Muhammadan Jurisprudence*¹³⁰ dianggap sebagai karya yang hebat dalam menolak kritikan tokoh-tokoh orientalis seperti Joseph Schacht, yang mempersoalkan hadis sebagai sumber asli dari Nabi s.a.w dan sekaligus mempertikaikan kewibawaan hadis sebagai sumber hukum bagi Islam.

¹²⁴ Harold Motzki, "The Collection of the Qur'an: A Reconsideration of Western Views in Light of Recent Methodological Development", *Der Islam*, 2001, ms. 1-34.; Muhammad Mustafa Al-`Azami, *The History of the Qur'anic Text from Revelation to Compilation: A Comparative Study with the Old and New Testaments*, London: Turath Publishing, 2010; Halim Sayoud, *Investigation on the Author's Style and the Authenticity of the Holy Quran*, 2021, T.tpt: EDT-Scholarpage, di http://sayoud.net/Book_Quran_Authenticity_New.pdf.

¹²⁵ F. Garret Boudinot and Joseph Wilson, "Does a proxy measure up? A framework to assess and convey proxy reliability", *Climate of the Past*, 16, 2020, ms. 1807–1820.

¹²⁶ Alvin I. Goldman, "Experts: Which Ones Should You Trust?", *Philosophy and Phenomenological Research*, 63:1, 2001, ms. 85–110; Asheley R. Landrum, Baxter S. Eaves Jr, and Patrick Shafto, "Learning to trust and trusting to learn: A theoretical framework", *Trends in Cognitive Sciences*, March, 19:3, 2015, ms. 109-11.

¹²⁷ Lihat Muhammad Mustafa Al-`Azami, *The History of the Qur'anic Text from Revelation to Compilation: A Comparative Study with the Old and New Testaments*, 2010, London: Turath Publishing.

¹²⁸ Lihat Mohammad Najeeb Qasmi, "Muhammad Mustafa Al-`Azami & His Contributions to Hadith", *IlmGate*, 2015, 1 Oktober, di <https://www.ilmgate.org/mawlana-muhammad-mustafa-azami/>

¹²⁹ Lihat Muhammad Mustafa Al-`Azami, *Studies in Hadith Methodology and Literature*, Oak Brook: American Trust Publications, 1978.

¹³⁰ Lihat Muhammad Mustafa Al-`Azami, *On Schacht's Origins of Muhammadan Jurisprudence*, Riyadh: King Saud University, 1985.

Dalam buku *The History of the Qur'anic Text*, penulis berusaha membuktikan bahawa Al-Quran yang ada di tangan umat Islam hari ini adalah asli sebagaimana ia diwahyukan kepada Nabi s.a.w sesuai dengan janji Allah taala untuk memeliharanya dari segala perubahan, baik dalam bentuk penambahan atau pengurangan. Penulis membuktikan perkara ini melalui kajian sejarah Al-Quran dari sejak penurunannya hingga pengumpulannya dalam versi mushaf Uthman dan penyalinan serta penyebarannya kemudian dari masa silam hingga ke masa kini. Dengan menggunakan kepakaran dalam bidang hadis, penulis menunjukkan bahawa Al-Quran yang ada dapat dipelihara keasliannya melalui sistem sanad yang ada dibangun oleh para ulama hadis. Selain itu, penulis juga membandingkan mushaf yang ada dengan salinan mushaf yang terdapat dalam simpanan pelbagai muzium dan universiti di dunia.

Kedua, ialah buku *Structure and Qur'anic Interpretation: A Study of Symmetry and Coherence in Islam's Holy Text*,¹³¹ oleh Raymond Farrin. Dalam buku ini, penulis berusaha menolak pendapat sebahagian sarjana bahawa Al-Quran yang ada bukan asli dari Nabi s.a.w, tapi ia adalah koleksi penulisan sekumpulan manusia semasa zaman pengumpulannya. Hal ini berdasarkan pada dakwaan bahawa Al-Quran yang ada bersifat rambang dan tidak tersusun. Penulis menunjukkan dalam buku ini bahawa Al-Quran sebenarnya amat tersusun dan berstruktur, walaupun ia tidak begitu jelas kecuali bagi sesiapa yang benar-benar memerhati dan mendalaminya. Berdasarkan struktur yang direkonstruksi oleh penulis, rumusan dibuat bahawa Al-Quran ini tidak mungkin dihasilkan dari koleksi simpanan atau penulisan sekumpulan manusia. Sifat strukturnya yang unik, sangat koheren dan konsisten hanya mungkin berlaku jika ia ditulis atau berasal dari satu sumber sahaja yang bersifat amat bijaksana. Namun, penulis tidak merumuskan kalau sumber yang satu dan bijaksana ini ialah Nabi s.a.w atau Tuhan dan menyerahkannya kepada sarjana Muslim.

Berkaitan dengan kededua kajian di atas ialah kajian Harold Motzki yang bertajuk *The Collection of the Qur'an: A Reconsideration of Western Views in Light of Recent Methodological Development*. Kajian ini menolak dakwaan sarjana orientalis bahawa keaslian Al-Quran tidak boleh dipercayai kerana ia hanya dapat dikumpulkan lama setelah Nabi s.a.w wafat dan laporan-laporan hadith dan sejarah tentang pengumpulannya juga tidak dapat dipastikan kesinambungannya. Mereka merumuskan bahawa jejak sejarah kewujudan Al-Quran hanya wujud pada puluhan tahun lebih lewat dari tarikh yang didakwa oleh ulama silam, iaitu tarikh pengumpulan dalam mashaf Uthmani sebagai naskhah induk bagi segala naskhah lain hingga ke zaman ini. Oleh itu, Al-Quran hanya satu kitab rekaan oleh pihak-pihak tertentu seperti penguasa dan agamawan di era kemudian untuk kepentingan tertentu. Motzki pula menyimpulkan bahawa asas bagi teori-teori pegangan sarjana orientalis yang dinyatakan itu sendiri bermasalah. Motzki menunjukkan bukti dalam kajiannya bahawa sejarah kewujudan Al-Quran boleh dijejak di zaman awal Islam lagi sebagaimana yang dikemukakan oleh ulama Islam, dan bukan sebagaimana yang didakwa oleh orientalis.¹³²

¹³¹ Lihat Raymond Farrin, *Structure and Qur'anic Interpretation: A Study of Symmetry and Coherence in Islam's Holy Text*, Oregon: White Cloud Press, 2014.

¹³² Harold Motzki, "The Collection of the Qur'an: A Reconsideration of Western Views in Light of Recent Methodological Development", *Der Islam*, 2001, ms. 1-34.

Yang sama juga boleh ditemui dalam artikel bertajuk *Forgotten Witness: Evidence for the Early Codification of the Qur'an*, oleh Estelle Whelan. Whelan menyimpulkan bahawa pelbagai jenis bukti yang terkumpul dalam kajiannya itu membawa pada satu rumusan, iaitu kebolehpercayaan bagi dakwaan sarjana Muslim yang ada dalam tradisi ilmu mereka tentang pengumpulan Al-Quran ke satu naskah oleh panel yang dilantik saidina Uthman. Naskah ini kemudiannya diwarisi oleh khalifah-khalifah sesudahnya sebagai alat bagi menyatukan pelbagai kaum di bawah satu empayar Islam yang pesat berkembang.¹³³

Ramai sarjana yang telah mengkaji perbandingan antara pelbagai qiraat dan manuskrip Al-Quran lama berpendapat bahawa ketekalan (*consistency*) yang tinggi antara keduanya adalah bukti bahawa Al-Quran sejak zaman awalnya lagi telah dipelihara melalui tradisi lisan dan penulisan. Adrian Brockett berhujah jika Al-Quran hanya disebarkan pada abad pertama secara lisan sahaja, sudah pasti terdapat banyak variasi pada teks-teks yang ada sebagaimana yang boleh dilihat pada koleksi bertulis hadis-hadis dan syair-syair Arab pra-Islam. Jika ia hanya disebarkan secara bertulis sahaja, pelbagai variasi juga akan dijumpa sebagaimana yang dapat dilihat dalam penyebaran dokumen yang merakam Perlembagaan Madinah. Hal ini, walau bagaimanapun, tidak didapati pada Al-Quran. Hal ini memberi petunjuk akan wujudnya kaedah penyebaran lisan dan tulisan secara selari. Versi tulisan membataskan variasi pada versi lisan sesuai dengan bentuk tulisan yang ada dan versi lisan pula membantu memelihara versi tulisan dari pengubahsuaian.¹³⁴

Ketiga, ialah buku *Investigation on the Author's Style and the Authenticity of the Holy Quran*,¹³⁵ oleh Halim Sayoud. Penulis berusaha membuktikan bahawa Al-Quran adalah wahyu dari Tuhan dan bukan karangan Nabi s.a.w sebagaimana yang diyakini oleh umat Islam. Pembuktian dilakukan dengan membuat analisa perbandingan antara ayat-ayat Al-Quran dan sampel dari matan hadis-hadis yang terkumpul dalam kitab-kitab hadis yang muktabar jika terdapat persamaan pada gaya dan bahasa. Untuk mencapai tujuan ini, penulis melakukan beberapa eksperimen dengan menggunakan kaedah stylometry¹³⁶ dengan bantuan teknologi komputer dan kepintaran tiruan. Hasil dari semua eksperimen dibuat penulis merumuskan bahawa gaya dan bahasa pada ayat-ayat Al-Quran dan hadis berbeza dan mustahil ia datang dari sumber yang sama. Bagi membuktikan pula bahawa Al-Quran adalah wahyu Tuhan, dan bukan bersumber dari manusia di zaman silam, penulis mengemukakan analisa pada kandungan beberapa ayat Al-Quran sebagai sampel yang mengandungi fakta-fakta sains yang menunjukkan bahawa mustahil fakta itu boleh diketahui oleh manusia di zaman silam kerana teknologi bagi mengetahuinya belum wujud, seperti ayat Al-Quran mengenai perkembangan janin di dalam rahim seorang wanita dan sifat alam yang berkembang.

¹³³ Estelle Whelan, "Forgotten Witness: Evidence for the Early Codification of the Qur'an", *Journal of the American Oriental Society*, Jan-Mar, 118/1, 1998, ms. 13.

¹³⁴ Adrian Brockett, "The Value of the Hafs and Warsh Transmissions for the Textual History of the Qur'an", *Approaches to the History of the Interpretation of the Qur'an*, edited by Andrew Rippin, Oxford: Clarendon Press, 1988, ms. 44.

¹³⁵ Lihat Halim Sayoud, *Investigation on the Author's Style and the Authenticity of the Holy Quran*, T.tpt: EDT-Scholarpage, 2021, di http://sayoud.net/Book_Quran_Authenticity_New.pdf

¹³⁶ Kaedah kajian kuantitatif dalam menganalisa gaya penulisan seseorang atau sesuatu genre yang boleh digunakan untuk mengenal pasti penulis sesuatu karya penulisan. Lihat "Stylometry", *dictionary.com*, di <https://www.dictionary.com/browse/stylometry>

Kewujudan fakta keserasian ayat-ayat Al-Quran dengan penemuan sains moden disokong juga oleh karya yang lebih awal oleh Maurice Bucaille dalam bukunya *The Bible, The Qur'an and Science* dan Gary Miller dalam *The Amazing Quran*, yang menyenaraikan lebih banyak lagi contoh.¹³⁷

Kesimpulan yang dapat dibuat dari segala kajian-kajian yang dinyatakan di atas ialah,

- Al-Quran yang ada sememangnya wahyu Tuhan dan bukan karangan manusia
- Keaslian naskhah Al-Quran sekarang ini dapat dijejak hingga ke zaman awal Islam, iaitu mushaf Uthmani yang menjadi naskhah induk Al-Quran
- Al-Quran bukan kitab yang ditulis Nabi Muhammad s.a.w semasa hidupnya atau mana-mana manusia atau sekumpulan manusia setelah kewafatan Nabi s.a.w
- Al-Quran mempunyai struktur yang kompleks dan kandungan yang melampaui manusia di zaman silam.

Atas dasar ini, pernyataan Al-Quran bahawa Kiamat pasti akan berlaku dan kewujudan hisab, syurga dan neraka adalah benar kerana ia adalah perkhabaran dari Tuhan Yang Maha Mengetahui dan Berkuasa, walaupun tiada bukti empirikal dapat dikemukakan bagi kesemua itu.

¹³⁷ Lihat Maurice Bucaille, *The Bible, the Quran and Science*, Kuala Lumpur: Dar al Wahi, 2021.; Gary Miller, *The Amazing Quran*, Jeddah: Abul-Qasim Publishing House, 1994.

¹³⁸ 18:45.